



Republika e Kosovës / Republika Kosova / Republic of Kosova
Komuna e Podujevës / Opština Podujevo / Municipality of Podujeva

KUVENDI I KOMUNËS

RREGULLORE PËR MBROJTJEN E MJEDISIT NË KOMUNËN E PODUJEVËS

Podujevë, 30 tetor 2019

Në bazë të neneve 11, 12.2 shkronja c), 17 shkronja e) dhe 40.2 shkronja a) të Ligjit për Vetëqeverisje Lokale nr.03/L-040, nenet 5 parag. 3 dhe 50 parag. 3 të Ligjit për Mbrojtjen e Mjedisit nr.03/L-025, neneve 14, 15 parag. 2.3, 19 parag. 1.5 dhe 34 parag. 2.1 të Statutit të Komunës së Podujevës nr.prot.01-020/01-0050862/18, Kuvendi i Komunës së Podujevës, në mbledhjen e mbajtur më 30 tetor 2019, miratoi,

RREGULLORE PËR MBROJTJEN E MJEDISIT NË KOMUNËN E PODUJEVËS

Dispozitat e përgjithshme

Neni 1

Me këtë rregullore krijohet baza juridike për mbrojtjen e mjedisit në nivel lokal për qytetarët e komunës së Podujevës (më poshtë e quajtur: Komuna), në mënyrë që të jetë e përballueshme dhe në përputhshmëri me zhvillimin e qëndrueshëm ekonomik të komunës.

Në procesin e mbrojtjes dhe përparimin e mjedisit është e domosdoshme njohja dhe zbatimi i legjislacionit mjedisor, si parakusht për shfrytëzimin racional të resurseve natyrore, për mbrojtjen efikase të sistemeve të gjalla dhe përparimin e tyre.

Vlerat natyrore gjeomorfologjike, hidrologjike, fitogjeografike, ambientale, peizazhore dhe estetike e hapësirës gjeografike të Podujevës, si dhe vlerat specifike të tyre, kanë një rëndësi të veçantë në aspektin shkencor, edukativ, kulturor, ekonomik dhe meritojnë tretman dhe status të veçantë shoqëror, sepse mjedisi duhet të ruhet jo vetëm për brezat e tashëm, por edhe për brezat e ardhshëm.

Duke parë nevojën e arritjes së standardit për mjedisin në Podujevë në harmoni me ato të Bashkimit Evropian, dedikuar qëllimit që mundëson një mjedis të shëndetshëm në rritje për qytetarët e Podujevës, duke pasur parasysh së vënia e standardeve të tilla dhe krijimi i një mjedisi të tillë duhet të formohet një standard, në mënyrë që të jetë konform me zhvillimin e qëndrueshëm ekonomik. Në këtë rregullore janë dhënë kushtet e përgjithshme për mbrojtjen e mjedisit në nivelin lokal, duke pasur parasysh gjithmonë edhe mbrojtjen e mjedisit regional dhe më gjerë, pasi që dihet se ndotja nuk njeh kufi.

Qëllimi i rregullores mjedisore

Neni 2

1. Në këtë rregullore janë përcaktuar rrethanat dhe kushtet e përgjithshme për mbrojtjen e mjedisit në komunën e Podujevës në përputhshmëri me specifikat e saj:
2. Qëllimi i përgjithshëm i kësaj rregulloreje është krijimi i një baze me rregulla mjedisore, e cila do të promovojë një ngritje të mjedisit të shëndetshëm për popullatën e Podujevës duke synuar arritjen e standardeve mjedisore Evropiane.

3. Qëllime specifike të rregullores janë:

- 3.1. Të sigurojë një mjedis që është i përballueshëm dhe konform me zhvillimin e qëndrueshëm ekonomik të komunës së Podujevës.
- 3.2. Të definojë punën e autoriteteve publike në komunën e Podujevës që do të bëjnë implementimin e rregullores, në bazë të autorizimeve dhe detyrave të dala nga dispozitat e Ligjit për Mbrojtje të Mjedisit dhe dispozitat e kësaj Rregulloreje.
- 3.3. Të përcaktohen të drejtat dhe detyrimet e personave dhe ndërmarrjeve të ndryshme të cilat veprojnë në komunën e Podujevës.
- 3.4. Të përcakton të drejtat dhe detyrimet e personave fizik dhe juridik për sigurimin e kushteve dhe masave për mbrojtjen e Mjedisit duke përfshirë detyrimin dhe përdorimin me përgjegjësi të resurseve natyrore, me qëllim të realizimit të së drejtës së qytetarëve për mjedis të shëndetshëm.

Objektivat e rregullores mjedisore

Neni 3

1. Objektivat themelore të rregullores janë:

- 1.1. Zvogëlimi gradual i ndotjes, degradimit dhe dëmit mjedisor si dhe minimizimi, ose ndalimi i atyre aspekteve ekonomike dhe aktiviteteve të tjera që përbëjnë një rrezik të madh për shëndetin e njeriut dhe mjedisit.
- 1.2. Shfrytëzimi racional dhe i qëndrueshëm i burimeve natyrore dhe tokës prodhuese, si dhe mbrojtja e akumulimeve gjenetike të natyrës.
- 1.3. Zbatimi i vlerësimit të ndikimit në mjedis.
- 1.4. Mbrojtja e vlerave të trashëgimisë natyrore dhe biodiversitetit në hapësirën e komunës së Podujevës.

Përkufizimet terminologjike

Neni 4

Biodiversiteti= Shumëllojshmëri Biologjike: Kompleksiteti biologjik i një numër specimesh të organizmave të një ekosistemi. Term që shënon të gjitha aspektet e shumëllojshmërisë biologjike, por sidomos pasurinë e llojeve, kompleksitetin e ekosistemeve dhe variacionin gjenetik.

Burim natyror me vlerë: do të thotë, fenomen i njohur natyror që është shumë i vlefshëm, i paktë dhe unik, një burim i tillë natyror mund të përfshijë fenomen unik gjeografik siç janë fosilet, mineralet të pa-zakonshme, akumulime apo formacione, shpella, gërxhe, lumenjve, fusha me ujë, bimë dhe kafshë unike, si dhe ekosisteme dhe peizazheve.

Degradim mjedisor: do të thotë degradim substancial i mjedisit (në atë shkallë që ndikon në kualitetin e jetës), nga ndotja, mbeturinat dhe plehrat ose nga përdorimi apo shfrytëzimi i paautorizuar i burimeve natyrore.

Dëm i mjedisit: është aktiviteti që ka potencial të jashtëzakonshëm dhe të dukshëm që ta dëmtojë mjedisin në mënyrë substanciale, apo të shkaktoj aksident mjedisor.

Ekologji: Shkenca biologjike e cila merret me studimin e ndërlikimeve të ndërlikuara dhe marrëdhënieve midis faktorëve abiotikë (mjedisorë) dhe biotikë (organizmave të gjallë), organizmave ose grupi të organizmave me njëri tjetrin dhe midis organizmave e mjedisit të tyre

jetësor. Studim i marrëdhënieve midis organizmave dhe midis organizmave e mjedisit të tyre jo të gjallë.

Ekosistem: Një njësi e cila përbëhet prej ndërveprimit të organizmave dhe mjedisit ku jetojnë. Bashkësi organizmash të ndërruar, së bashku me mjedisin ku jetojnë e me të cilin ata ndërveprojnë e që është i dallueshëm nga bashkësitë e mjedisi pranë tyre.

Fitocenoza: Nënkupton shoqërimet, mbulesën e individëve të llojeve të ndryshme bimore në një ekosistem.

Fitodiversiteti: Kompleksiteti biologjik i një numër specimesh të organizmave bimore të një ekosistemi. Term që shënon të gjitha aspektet e shumëllojshmërisë bimore, por sidomos pasurinë e llojeve, kompleksitetin e ekosistemeve dhe variacionin gjenetik.

Hedhurinë: pjesë e mbeturinës, lëndë ose substancë e cila mbetet pas përpunimit të mbeturinës, komponente ose elemente të cilat nuk kanë vlerë përdorimi.

Inspektor mjedisor: do të thotë personi që ka autorizimet e duhura me ligj apo aktet normative të nxjerra nga ligji për mbrojtje të mjedisit, të bëjë inspektimin e zhvillimeve dhe aktiviteteve të tjera si dhe determinimet preliminare rreth konformitetit apo jo- konformitetit të aktiviteteve të tilla me këtë rregullore apo akte normative të nxjerra në pajtim me ligjin.

Komuna: njësi themelore e vetëqeverisjes lokale në Republikën e Kosovës.

Leje Mjedisore Komunale (LMK) - është dokument me shkrim që e lëshon Komuna, për veprimtari që kanë ndikim në mjedis, sipas Ligjit dhe Akteve tjera nënligjore;

Mbeturina të rrezikshme: janë mbeturina të cilat janë të ndezshme, korrozive, reaktive ose toksike dhe mbeturina të tilla janë klasifikuar si të rrezikshme nga BE-ja.

Ndotës: do të thotë personat që shkaktojnë ndotje.

Mbeturina: çdo substancë ose lëndë të cilën zotëruesi e hedh, mendon ta hedh ose është i detyruar ta hedh.

Mbeturinat komunale:- janë mbeturina nga amvisëritë, po ashtu edhe mbeturina nga aktivitetet tjera të cilat për shkak të përbërjes dhe natyrës së tyre, janë të ngjashme me ato të amvisërisë.

Mbrojtja e mjedisit: Çdo aktivitet që synon ruajtjen ose përmirësimin e pastërtisë së mjedisit përmes parandalimit të shkarkimeve të substancave ndotëse apo zhurmave në mjedis. Gjithashtu këtu përfshihen aktivitete që synojnë konservimin e specieve të egra dhe habitateve të tyre, mbrojtjen e peizazhit, aktivitetet për monitorimin dhe analizimin e kushteve mjedisore.

Mjedis - Ambient: Tërësia e të gjitha kushteve të jashtme që ndikojnë jetën, zhvillimin dhe mbijetesën e një organizmi. Tërësia e kushteve natyrore, në të cilat jeton e zhvillohet njeriu a një qenie tjetër, ndodhet e ndryshon një send, zhvillohet një dukuri etj; gjithçka që rrethon një organizëm dhe ndikon mbi të; hapësira a sendet që na rrethojnë.

Ndotës: do të thotë personat që shkaktojnë ndotje

Ndotje: do të thotë shkarkimin e një substance (duke përfshirë substanca në formë të ngurtë, lëngët apo në formë të gaztë) ose energji (duke përfshirë vibrimin, radiacionin, ngrohjen, dritën, zhurmën apo forma të tjera të energjisë) në mjedis, që ka potencial domethënës që t'i shkaktojë dëme shëndetit njerëzor, organizmave të gjallë apo ekosistemeve apo dëm mjedisor.

Person: do të thotë një person fizik apo juridik.

Pëlqim mjedisor: do të thotë autorizim me shkrim i nxjerrë në pajtim me këtë ligj, që në rrethana të përshkruara me këtë ligj ose akte normative të nxjerra në pajtim me këtë ligj, më qëllim marrjen e lejes për ndërtim.

Plan Rregullues Urban i Hollësishëm: Nënkupton planin e përcaktuar sipas Ligjit për Planifikim.

Plan Zhvillimor Komunal PZHK: Nënkupton planin e përcaktuar sipas Ligjit për Planifikim.

Plan Zhvillimor Urban PZHU: Nënkupton planin e përcaktuar sipas Ligjit për Planifikim.

Publiku: konsiderohet një ose më shumë persona juridik ose fizik , shoqatat e tyre organizatat apo grupimet.

Resurset natyrore: janë të gjithë përbërësit e natyrës që njeriu i shfrytëzon për qëllime ekonomike. Resurset natyrore mund të jenë : të papë (lëndët minerale) dhe të përsëritshme (të mirat biologjike, uji, toka e përsëritshme)

Riciklim: do të thotë mbledhja selektive e mbeturinave komunale me qëllim të riprodhimit dhe ripërdorimit. Materiali i njëjtë përdoret për të prodhuar një produkt të njëjtë ose të ngjashëm me të përparshmen.

Sanimi: është proces i ndërmarrjes së masave për ndalimin e ndotjes dhe degradimin e mëtutjeshëm të mjedisit deri në nivelin i cili është i sigurt për shfrytëzim të mëtutjeshëm të lokacionit, duke përfshirë, rregullimin e hapësirës, revitalizimin dhe rikultivimin.

Sipërfaqe publike: konsiderohen rrugët, trotualet, parkingjet, rrugicat, stacioni i autobusëve, parqet, pompat e derivateve, tregjet, varrezat, shëtitoret, terrenet sportive dhe argëtuese, pishinat publike, hapësirat ndërmjet dhe rreth ndërtesave kolektive të banimit, toka të pa shfrytëzuara.

Statusi i mjedisit të rrezikuar: është gjendje mjedisore kur tejkalohet shkalla e ndotjes e përcaktuar në bazë të matjeve , hulumtimeve dhe vlerësimit të indikatorve të gjendjes , në raport me normal e lejuara.

Vlerat e natyrës: janë pjesë të natyrës të cilat meritojnë mbrojtje të veçantë për shkak të ndjeshmërisë së tyre ose interesit shkencor, estetik, kulturor, historik, arsimor dhe ekonomik.

Vlerësimi i ndikimit në mjedis ("VNM"): do të thotë vlerësimi për të determinuar dëmet e mundshme mjedisore nga ndërtimi dhe aktivitete të tjera zhvillimore.

Zona të mbrojtura natyrore: Zona me pasuri ose llojshmëri të rrallë natyrore të cilat vihen nën mbrojtje për të siguruar ruajtje të qëndrueshme dhe për të penguar ndonjë përçarje. Janë pjesë të ruajtura të natyrës, me veçori dhe vlera të veçanta natyrore, të cilat kanë rëndësi të përhershme ekologjike, shkencore, kulturore-arsimore, rekreative dhe turistike dhe si vlera me interes të përgjithshëm gëzojnë mbrojtje të veçantë.

Zonat e mbrojtura të natyrës: Zona me pasuri ose llojshmëri të rrallë natyrore të cilat vihen nën mbrojtje për të siguruar ruajtje të qëndrueshme dhe për të penguar ndonjë përçarje. Në këto zona nuk lejohet zhvillimi i asnjë aktiviteti ekonomik, dëmtim ose ndryshim.

Zonë Urbane: zona e cila fizikisht formon pjesën e një qyteti dhe karakterizohet me pjesë të rëndësishme të sipërfaqeve të ndërtuara, densitetit të lartë të popullsisë dhe banimit, punësim dhe transport të konsiderueshëm dhe infrastrukturë tjetër. Zonat urbane mund gjithashtu të përmbajnë zona të gjelbra zakonisht të shfrytëzuara për qëllime rekreative.

Zoodiversiteti: Kompleksiteti biologjik i një numër specesh të organizmave shtazorë të një ekosistemi. Term që shënon të gjitha aspektet e shumëllojshmërisë shtazore, por sidomos pasurinë e llojeve, kompleksitetin e ekosistemeve dhe variacionin gjenetik.

Mirëmbajtja e sipërfaqeve publike dhe hapësirave të tjera

Neni 5

Për mirëmbajtjen e parkingjeve, tregjeve, sipërfaqeve të gjelbëruara, varrezave, shtratin e lumenjve, shtratin e proçkave, kujdesen ndërmarrjet e autorizuar.

Neni 6

Të gjitha oborret duhet të jenë në gjendje të rregullt dhe të pastër, ku për mirëmbajtjen e tyre obligohen nga kjo rregullore që të kujdesen pronarët, respektivisht shfrytëzuesit e tyre (Këshillat banesorë apo të lagjeve).

Neni 7

Me qëllim të mirëmbajtjes më të mirë të gjendjes së pastërtisë në vendet publike vendosen shportat e mbeturinave, për të cilat kujdeset ndërmarrja përkatëse, nëse është e specifikuar me kontratë.

Neni 8

Për mirëmbajtjen e pastërtisë në tregje dhe objektet e tregjeve do të kujdeset ndërmarrja e obliguar për menaxhimin e tyre dhe ato duhet të mbahen në gjendje të rregullt dhe të pastër. Çdo ditë tregjet, pas kalimit të kohës së punës, duhet të pastrohen.

Neni 9

1. Për pastërtinë në oborret e Shkollave të Komunës së Podujevës janë të obliguar të kujdesen dhe ta menaxhojnë vetë shkollat.
2. Shkollat janë të obliguara që të kujdesen për gjelbërimin dhe ruajtjen e tij në oborret shkollore.

Neni 10

Institucionet administrative dhe publike janë të obliguara t'i mirëmbajnë oborret e tyre.

Mirëmbajtja e pastërtisë dhe ruajtja nga degradimi mjedisor

Neni 11

Obligohet çdo ekonomi familjare dhe objekte afariste që të kyçet në sistem të kanalizimit të ujërave të zeza, në ato vendbanime ku ekziston sistemi i kanalizimit publik.

Neni 12

1. Të gjithë qytetarët, pronarët e ndërtesave familjare të banimit, pronarët e lokaleve afariste në vendet urbane dhe jo urbane kanë për obligim të mirëmbajnë hapësirat rreth objekteve të tyre rrugët publike dhe objektet e ujit si dhe sipërfaqe të tjera të hapura me interes të përgjithshëm.
2. Të gjithë personat fizik dhe juridik, pa përjashtim të asnjë qytetari, kanë për obligim të ruajnë ambientin nga degradimet e ndryshme si: brenda zonave urbane ndalohet marrja e dheut si dhe prishja e argjinaturave rreth lumenjve dhe rrjedhave të tyre si dhe vendeve të ndryshme, marrja e rërës dhe gurëve në lum. Nxjerrja dhe eksploatimi i shkëmbinjve të cilët bëjnë degradim mjedisor. Të gjitha këto kategori të ndotjes dhe degradimit, janë të obliguar që të pajisen me leje përkatëse.

3. Me qëllim të mbrojtjes së mjedisit në Komunën e Podujevës ndalohet:
 - 3.1. Hedhja e mbeturinave dhe materialeve tjera fundrrinore në shtratin e lumenjve, përrenjve, kanaleve, në rrugë dhe sipërfaqeve të tjera publike;
 - 3.2. Hedhja dhe vendosja e plehut të kafshëve në sipërfaqet jashtë oborreve si dhe në pronën e tyre, në vendet ku distanca nuk është e mjaftueshme nga vendet e banuara me popullatë njerëzore;
 - 3.3. Përdorimi i puseve të braktisura për t'i derdhur ujërat e zeza apo për t'i deponuar mbeturinat;
 - 3.4. Larja e veturave dhe automjeteve bartëse në lumenj dhe rreth brigjeve të tyre;
 - 3.5. Ndezja e zjarreve prej mbeturinave dhe materialeve të tjera që ndotin ajrin dhe mjedisin në përgjithësi;
 - 3.6. Ndezja e zjarreve prej gomave dhe materialeve prej gomës dhe tekstilit.
 - 3.7. Dëmtimi i bimëve (luleve) dhe pjesëve të gjelbëruara të qytetit në përgjithësi
 - 3.8. Vendosja e ushqimit të kafshe në vende dhe hapësira publike ku e dëmtojnë hapësirat e gjelbëruara dhe imazhin e tyre në përgjithësi.
 - 3.9. Ndalohet eksploatimi i dheut në hapësira publike.
 - 3.10. Kompanitë janë të obliguara, që pas kryerjes së punimeve, t'i largojnë mbeturinat nga vend punishtja dhe deponimi i tyre të bëhet në deponi të licencuar.
4. Me qëllim të ruajtjes së sipërfaqeve të gjelbëruara publike ndalohet:
 - 4.1. Krasitja, prerja e drunjve, thyerja e degëve të fidanëve, kositja dhe largimi i barit nga sipërfaqet e gjelbëruara pa pëlqimin e Drejtorisë, respektivisht shërbimit përkatës.
 - 4.2. Shfrytëzimi për kullosa të kafshëve.
 - 4.3. Largimi, djegia, dëmtimi i shenjave të mbishkrimit të vendosura me qëllim të ruajtjes së mjedisit dhe sipërfaqeve të gjelbëruara.

Mbrojtja e biodiversiteti

Neni 13

1. Me qëllim të mbrojtjes së Zoodiversitetit në komunën tonë ndalohet gjuetia e pakontrolluar dhe e palicensuar.
2. Ndalohet rreptësisht gjuetia në zonat e mbrojtura dhe rezervatet e shtazëve të parapara nga shoqata e gjuetarëve për mbrojtje të shtazëve.
3. Ndalohet gjuetia e zogjve mishngrënës (Fajkoi, Shqiponjën e maleve, Huti malor) si dhe atyre jo mishngrënës (thëllënza e gurëve, pulëdushku).
4. Ndalohet gjuetia e shtazëve të mëdha (ariu i murrëm, kaprollit, ujkut, dhelprës dhe macja e egër).
5. Ndalohet shkatërrimi dhe dëmtimi i foleve të zogjve, shpellave dhe çerdheve të shtazëve tjera, prerja e drunjve ku janë të vendosura foletë e zogjve.

Neni 14

1. Me qëllim të mbrojtjes së fitodiversitetit ndalohen këto veprimtari në zonat e ndryshme Fitosociologjike dhe fitocenologjike në territorin e komunës:

- 1.1. Shkatërrimi dhe dëmtimi i monumete natyrore botanike, monumete natyrore hidrologjike dhe monumete natyrore gjeomorfologjike të shpallura si të mbrojtura me PLVM dhe PZHK.
- 1.2. Prerja dhe dëmtimi i zonave dhe peizazheve të mbrojtura bimore të shpallura si të mbrojtura me PLVM dhe PZHK.

Shfrytëzuesit e resurseve natyrore

Neni 15

1. Personat juridik ose fizik mund të kryejnë aktivitete në hulumtimin, zbulimin dhe shfrytëzimin e burimeve natyrore në territorin e Komunës sipas këtyre kushteve:

- 1.1. Paraprakisht duhet të paraqes kërkesë në institucionet përkatëse, dhe të merr leje përkatëse;
- 1.2. T'i nënshtrohet procedurës së Vlerësimit të Ndikimit në Mjedis (VNM), në përputhje me nenin 22 të Ligji për Mbrojtjen e Mjedisit dhe ligjit për Vlerësimin e Ndikimit në Mjedis;
- 1.3. Të respektojë dispozitat ligjore dhe rregullat lidhur me aktivitetet e tij, nëse burimi natyrore është pronë publike, të ketë koncesion ose ndonjë të drejtë tjetër adekuate për përdorimin dhe shfrytëzimin e burimeve në përputhje me ligjin;
- 1.4. Gjatë aktivitetit të zvogëlojë çrregullimet mjedisore që rrjedhin prej tij dhe
- 1.5. Pas ndërprerjes së veprimtarisë, të rehabilitojë ose rikthejë mjedisin në gjendje të mëparshme, në përputhje me projektin e rehabilitimit.

Vlerësimi i ndikimit në mjedis (VNM) dhe raporti i vlerësimit të ndikimit në mjedis për leje mjedisore komunale (LMK)

Neni 16

1. Zbatimi i punëve ndërtimore apo instalimeve dhe skemave të ndryshimit-intervenime në mjedise natyrore, duke përfshirë ekstraktimin e mineraleve, e në qoftë se një projekt i tillë ka potencial të bëjë dëm mjedisor, është i obliguar të bëjë Vlerësimin e Ndikimit në Mjedis.

2. Personi, ndërmarrja apo organi publik që planifikon të modifikojë një projekt dhe, në rast se kjo paraqet një rrezik potencial për të rritur apo zmadhuar shkarkimin ose shpërndarjen e dëmit mjedisor, duhet t'i nënshtrohet VNM-së apo Raportit për LMK.

3. Komuna nuk do të lëshojë Lejen për Ndërtim apo kryerje të aktiviteteve, nëse një projekt i tillë është subjekt i VNM-së apo LMK-së dhe për të cilin nuk është siguruar pëlqim mjedisor, respektivisht leja mjedisore apo LMK nga autoritetet kompetent (MMPH apo Komuna).

Neni 17

Vlerësimi i ndikimit në mjedis, por edhe Raportit për LMK do të bëhet nga kompani (person juridik) të licencuar për VNM dhe MMPH.

Neni 18

Askush nuk ka të drejtë të ndërmarrë, apo kryej ndonjë veprimtari, e cila mund të paraqes ndikime në mjedis dhe për të cilin më parë nuk është siguruar autorizimi mjedisor nga MMPH apo Komuna, sipas Ligjit për Mbrojtjen e Mjedisit dhe akteve tjera nënligjore.

Neni 19

Obligohen që çdo veprimtari apo objekte të pajisen me Leje Mjedisore Komunale (LMK) të cilat janë të precizuara me Udhëzim Administrativ për Leje Mjedisore Komunale (NR.01/2017).

Gjelbërimi i hapësirave publike

Neni 20

1. Me qëllim të zgjerimit dhe mirëmbajtjes së sipërfaqeve publike, të gjelbëruara dhe mbëltimeve të fidanëve në qytet dhe vende urbane, duhet të mbikëqyren dhe mbrohen në mënyrë të caktuar me këtë rregullore:
 - 1.1. Sipërfaqet e gjelbëruara (parqet, sheshet, rendet e fidanëve, gjelbërimi i lagjeve të komplekseve banesore dhe gjelbërime tjera).
 - 1.2. Pjesët mbrojtëse të lagjeve në vendet urbane, paralagjet, në vendet e banuara dhe vendet industriale (pjesët mbrojtëse të gjelbërimit, bregut të lumit dhe të sipërfaqeve të tjera ujore) përveç tokës mbrojtëse pyjore e cila është pjesë përbërëse e sistemit për mbrojtjen nga erozioni.
 - 1.3. Sipërfaqet e gjelbëruara të ndërmarrjeve, të organizatave të ndryshme dhe subjekte tjera.
 - 1.4. Sipërfaqet e gjelbëruara me destinim të veçantë dhe të dobishme (gjelbërimi rreth varrezave, rreth objekteve kulturore historike, dhe objekteve tjera me rëndësi).
 - 1.5. Gjelbërimi i vendeve për rekreacion, i lokaliteteve turistike dhe shëtitore, sipas PZHK-së, PZHU-së dhe HZ-së.
2. Dispozitat e kësaj Rregullore nuk kanë të bëjnë me pyjet, tokat bujqësore dhe pjesët tjera të natyrës për të cilat zbatohen dispozita tjera.

Neni 21

Gjelbërimi i sipërfaqeve në vendet e sapondërtuara duhet të parashihi me projektet e ndërtimeve të tjera dhe të bëhet me anë të kontrollit profesional nga ana e Drejtorisë dhe shërbimeve përkatëse sipas PZHK-së, PZHU-së dhe HZ-së.

Neni 22

Projektet e objekteve të sapondërtuara por edhe të atyre që ndërtohen në pjesët e ndryshme të qytetit duhet të kenë të përfshira edhe pjesën e gjelbëruar, në të kundërtën ato plane konsiderohen si jo të plota dhe nuk mund të lejohen.

Mbrojtja e tokës

Neni 23

Personat juridik dhe fizik të cilët me aktivitetet e tyre në territorin e Komunës, bëjnë hulumtimin dhe shfrytëzimin e burimeve natyrore, grumbullimin e mbeturinave, hirit, ngjyrës ose materialeve tjera, shkaktojnë erozion të tokës apo ndryshim në regjimin e ujit, duhet të ruajnë shtresën sipërfaqësore të tokës, rivendosin regjimin e mëparshëm ujqor dhe stabilitetin gjeo - mekanik të tokës gjatë veprimtarisë dhe pas përfundimit të këtyre aktiviteteve.

Mbrojtja e ajrit

Neni 24

Subjektet të cilat disponojnë me burim të ndotjes së ajrit janë të obliguar që me masa tekniko-teknologjike dhe masat tjera, të sigurojnë që shkarkimet dhe shpërndarjet në ajër të jenë në kufijtë e vlerave të përkufizuara dhe përcaktuara me ligj dhe aktet tjera.

Mbrojtja e ujit

Neni 25

1. Në përputhje me aktet e veçanta normative të Qeverisë dhe me mundësitë e Komunës që të përballojë këto nivele, do të themelohen nivelet maksimale të lejueshme të shkarkimit dhe shpërndarjes së ndotësve të ujit.

2. Duke respektuar standardet dhe rregullat mbi vlerat e përkufizuara të ndotjes së ujit, ndalohet:

2.1. Shkarkimi në ujëra i materieve toksike dhe jotoksike, të ngurta, të lëngëta ose të gazta, organizmave të gjalla duke përfshirë edhe organizmat e modifikuar gjenetikisht dhe formave të energjisë që shkaktojnë ndryshimin e kthjelltësisë, dekantimit, shtresimit dhe aromës ose ndryshime tjera në cilësinë e ujit;

2.2. Shkarkimi në sistemet publike të kanalizimit i ujërave të ndotura, të cilët përmbajnë substanca mbi vlerat e përkufizuara ose materiale të dëmshme, të cilat mund të shkaktojnë probleme në sistemin e kanalizimit ose objekteve për pastrimin e ujit;

2.3. Përdorimi i puseve të braktitura si gropa septike për ujëra të ndotura.

Mbrojtja nga zhurma

Neni 26

1. Drejtoria e Planifikimit Urban dhe Mbrojtje së Mjedisit, në përputhje me dispozitat e nxjerra nga MMPH, ndërmerr masa për mbrojtjen nga zhurma dhe me aktet e LPH, përkatësisht nga PZHK, PZHU dhe HZ, caktojnë zonat e vendbanimeve, zonat për pushim dhe rekreacion.

2. Komuna harton Hartën e Zhurmës.

3. Drejtoria e Inspeksionit bënë matjet sistematike të zhurmës dhe vibrimeve.

Ndalohet zhurma që kalon standardet e lejuara (90 dB) në hapësirat publike (nga muzika, nga veturat me zhurmë të lartë, nga lokalet që punohet me makina që kanë zhurmë të lartë që i pengojnë banorët për rreth dhe lloje tjera të zhurmës që i kalojnë standardet e lejuara (80 dB) nëpër vende rekreative të cilat janë të përcaktuara me PZHK, PZHU dhe HZ.

Zonat e mbrojtura të natyrës

Neni 27

1. Zonat me vlera të veçanta natyrore, me interes për Komunën, gëzojnë mbrojtje të veçantë me ligj dhe akte të tjera të nxjerra në pajtim me ligjin.
2. Me qëllim të ruajtjes së zonave të natyrës me vlera të veçanta, organet komunale kanë për obligim ti propozojnë dhe t'i shpallin, si dhe t'i menaxhojnë këto zona.
3. T'i propozojnë Kuvendit Komunal shpalljen e zonave të mbrojtura.
4. Për ruajtjen e tyre janë të obliguar të gjitha institucionet shtetërore e private si dhe të gjithë qytetarët e Podujevës.
5. Organet Komunale nxjerrin plane dhe dokumente tjera për menaxhimin e këtyre zonave.

Masat e veçanta për mbrojtjen e mjedisit

Neni 28

1. Për rastet e aksidenteve të mundshme ekologjike ose rastet e rrezikimeve të jashtëzakonshme të mjedisit, rrezikimit të shëndetit dhe jetës së njerëzve në territorin e Komunës së Podujevës, Komuna me propozim të Drejtorisë së Planifikimit Urban dhe Mbrojtjes së Mjedisit dhe të Drejtorisë së Shëndetësisë dhe Mirëqenies Sociale nxjerrë planet e veprimit për këto raste:
2. Planet e veprimit duhet t'i përmbajnë këto pika:
 - 2.1. llojet e rrezikshmërisë si pasojë e aksidentit ekologjik,
 - 2.2. procedurat dhe masat për zbutjen dhe eliminimin e pasojave të drejtpërdrejta të dëmshme për mjedis,
 - 2.3. organet për zbatimin e masave të caktuara,
 - 2.4. përgjegjësitë dhe autorizimet lidhur me zbatimin e masave.

Informimi për mbrojtjen e mjedisit

Neni 29

1. Drejtoria e Planifikimit Urban dhe Mbrojtjes së Mjedisit mban të dhëna, të cilat nuk janë pjesë e Sistemit Informativ për Mbrojtjen e Mjedisit, e të cilat përfshijnë pa kufizim:
 - 1.1. Të gjitha subjektet që ndërmarrin veprimtari të autorizuar dhe veprimtaritë e tyre;
 - 1.2. Kërkesat për miratim, licencat dhe autorizime të tjera që kërkohen të jepen dhe çdo informacion të mëtejshëm në lidhje me to;
 - 1.3. Çfarëdo informacioni tjetër të marrë ose të siguruar sipas dispozitave të Ligjit për Mbrojtjen e Mjedisit apo akteve tjera normative;
 - 1.4. Hollësi për gjopa të vendosura sipas Ligjit dhe akteve tjera normative.

Mbikëqyrja

Neni 30

1. Mbikëqyrjen mbi zbatimin e dispozitave të kësaj Rregulloreje e bëjnë Drejtoria e Planifikimit Urban dhe Mbrojtjes së Mjedisit; Drejtoria e Inspektionit, Drejtoria e Shërbimeve Publike, Mbrojtjes dhe Shpëtimit; Drejtoria e Shëndetësisë dhe Mirëqenies Sociale dhe të gjitha organet që kanë ndikim të drejtpërdrejt në zbatimin e dispozitave të kësaj Rregullore.
2. Në kuadër të kompetencave dhe detyrave, Zyrtari për Mjedis kryen këto detyra:
 - 2.1. Harton politikat mjedisore brenda territorit të Komunës dhe harton plane mjedisore për ruajtjen e natyrës dhe ambientit brenda territorit të Komunës dhe jep propozime për Kuvendin Komunal.
 - 2.2. Vendime, njoftime tjera komform nevojave që paraqiten duke u bazuar në Ligj,
 - 2.3. Jep propozime për zgjedhjen e çështjeve të ndryshme mjedisore,
 - 2.4. Sjell standarde mjedisore në Komunë në harmoni me Ligjin për Mbrojtje të Mjedisit dhe aktet e tjera të nxjerra nga ky Ligj,
 - 2.5. Cakton prioritetet afatgjata dhe afatshkurtra mjedisore brenda territorit të Komunës.
 - 2.6. Punët administrative dhe profesionale i kryen në bashkëpunim me Ministrin për çështje të caktuara.
 - 2.7. Mbikëqyr zonat e mbrojtura të natyrës.
 - 2.8. Bashkëpunon me organet më të larta komunale dhe ndërkomunale.
 - 2.9. Bashkëpunon me shoqërinë civile dhe komunitetin.
3. Në kuadër të kompetencave dhe detyrave inspektori i mjedisit kryen këto detyra:
 - 3.1. Është përgjegjës për mbikëqyrjen e çrregullimeve mjedisore të karakterit lokal, ndikimi i të cilave nuk kalon kufijtë e Komunës dhe të cilat mund të zgjidhen, kontrollohen, parandalohen nga vetë Komuna.
 - 3.2. Ndërmerr këto masa:
 - 3.3. Lëshon urdhëresa mbi mënjanimin e gjërave dhe sendeve të tjera nga sipërfaqet publike të cilat do të jenë në rrezik potencial për ndotjen e mjedisit, rrezikun e shëndetit dhe jetës së njerëzve.
 - 3.4. Inspektori i Mjedisit nxjerr Aktvendim,
 - 3.5. Shqipton dhe arkëton gjobat e parashikuara me vendimet e Kuvendit Komunal dhe ndërmerr masa tjera, për të cilat është i autorizuar me këtë Rregullore dhe dispozita të veçanta.
 - 3.6. Në zbatimin e kësaj Rregulloreje dhe dispozitave të tjera të veçanta Inspektori Komunal i Mjedisit shqipton masat administrative dhe merr veprime të tjera të cilat janë të autorizuar me vendimin e Kuvendit Komunal.
4. Kundër vendimit të Inspektorit Komunal për Mjedisin ankesa i drejtohet Ministrisë së Mjedisit dhe Planifikimit Hapësinor.

Dispozitat ndëshkuese

Neni 31

1. Të gjitha aktet normative të nxjerra në pajtim me Ligjin e Mjedisit do të përmbajnë dispozitat që specifikojnë gjobat që mund të imponohen për kundërvajtje.
2. Çdo dispozitë mbi gjobat e tilla të akteve plotësuese normative do të sigurojë që një gjobë e tillë është proporcionale deri në mënyrën e dënimit të shkaktuar dhe e interesit nga një kundërvajtje.

Neni 32

1. Me gjobë në të holla prej **500 € - 1000 €** do të gjobiten të gjithë shkelësit e nenit 5.
2. Me gjobë në të holla prej **50 € - 100 €** do të gjobiten të gjithë shkelësit e nenit 6.
3. Me gjobë në të holla prej **250 € - 500 €** për persona fizik, dhe **500 € - 1000 €** për personat juridik, do të gjobiten të gjithë shkelësit e paragrafëve 2 dhe 3 të nenit 12, ndërsa shkelësit e paragrafit 1 të nenit 12 gjobiten prej **200 € - 300 €**.
4. Të gjithë personat juridik që bien ndesh me nenin 8 gjobiten me shumën prej **500 € - 1000 €**.
5. Shkelësit e nenit 9 dhe nenit 10 do të gjobiten me të holla prej **200 € - 300 €**.
6. Të gjitha autoritetet që nuk i përmbahen nenit 11 do të gjobiten me gjobën prej **500 € - 1000 €**.
7. Shkelësit e paragrafit 1.1 të nenit 15 do të gjobiten me gjobën prej **250 € - 500 €** për persona juridik, kurse personat fizik gjobiten prej **100 € - 150 €**. Shkelësit e paragrafit 1.2 të nenit 15 dënohen me gjobë **250 € - 500 €** për personat juridik, ndërsa **100 € - 150 €** personat fizik. Kurse shkelësit e paragrafit 1.5 të nenit 15 dënohen me gjobë **100 € - 150 €** për personat fizik, ndërsa **250 € - 500 €** personat juridik. Shkelësit nga paragrafi 3.10 të nenit 12 gjobiten **200 € - 300 €** për personat fizik, kurse **300 € - 600 €** personat juridik. Shkelësit e paragrafit 3.9 të nenit 12, dhe paragrafit 2.1 të nenit 25 gjobiten **50 € - 70 €** për persona fizik, kurse **50 € - 100 €** personat juridik. Shkelësit e paragrafit 4 të nenit 12, dënohen me gjobë **100 € - 200 €** për persona fizik, kurse **250 € - 500 €** personat juridik.
8. Shkelësit e paragrafit 1 të nenit 16, dhe paragrafëve 3.2; 3.3; 3.4 dhe 3.5 të nenit 12, do të gjobiten me gjobën prej **100 € - 200 €**, kurse shkelësit e paragrafit 3.1 të nenit 12, gjobiten **150 € - 200 €**. Shkelësit e paragrafit 3.6 të nenit 12, gjobiten **100 € - 200 €** për personat fizik, kurse **500 € - 1000 €** personat juridik. Shkelësit e paragrafit 3.7 të nenit 12, gjobiten **50 € - 100 €** për personat fizik, kurse **200 € - 300 €** personat juridik. Shkelësit e paragrafit 3.8 të nenit 12, gjobiten **50 € - 100 €** për personat fizik, kurse **200 € - 300 €** personat juridik. Ndërsa shkelësit e paragrafit 3.9 të nenit 12, gjobiten **200 € - 300 €** për personat fizik, kurse **200 € - 300 €** personat juridik.

9. Shkelësit e paragrafit 1 të nenit 27 do të gjobiten me gjobën prej **600 € - 1000 €** për persona fizik, kurse **1500 € - 3000 €** personat juridik.

Shkelësit e paragrafit 2 të nenit 27 do të gjobiten me gjobën prej **300 € - 800 €** për persona fizik, kurse **1500 € - 3000 €** personat juridik.

Shkelësit e paragrafit 3 të nenit 27 do të gjobiten me gjobën prej **500 € - 1500 €** për persona fizik, kurse **1500 € - 5000 €** për personat juridik.

10. Shkelësit e paragrafit 1.2 të nenit 15 do të gjobiten me gjobën prej **150 € - 300 €** për persona fizik, kurse **500 € - 1000 €** personat juridik.

Shkelësit që nuk respektojnë nenit 19 për pajisje me Leje Mjedisore Komunale gjobiten **500 € - 800 €**.

11. Shkelësit e nenit 26 do të gjobiten me gjobën prej **30 € - 80 €** për persona fizik, kurse **200 € - 400 €** personat juridik.

12. Shkelësit e nenit 11 gjobiten me gjobë prej **100 € - 200 €**, ekonomitë familjare, kurse me gjobë prej **200 € - 300 €** objektet afariste.

Neni 33

Inspektori Komunal për Mbrojtjen e Mjedisit ka autorizim të shqiptojë dënimin (gjobën) mandator në shumë prej **5 € - 100 €**, në përputhshmëri me Udhëzimin Administrativ për Gjobat Mandatore.

Neni 34

Nëse pengohet Inspektori Komunal në kryerjen e obligimeve të veta dhe nëse personi fizik apo juridik nuk jep informata për identitetin dhe informata tjera, gjoba do të jetë prej **100 € - 200 €** për persona fizik dhe **300 € - 500 €** për persona juridik.

Neni 35

Për kundërvajtje të caktuar me këtë Rregullore nuk do të përfshihen jo madhorët (të miturit), por do të dënohen me gjobë prindërit respektivisht kujdestarët e tyre.

Neni 36

Kundërvajtësit të cilët nuk i përgjigjen gjobave mandatorë, Inspektori i mjedisit do të bëjë kërkesë për ekzekutim te Përmbaruesi Privat.

Dispozitat kalimtare

Neni 37

Për zbatimin e kësaj Rregullore do të kujdesen Drejtoria e Inspeksionit në bashkëpunim me Drejtorinë e Planifikimit Urban dhe Mbrojtjes së Mjedisit dhe Policinë e Kosovës si dhe me organet tjera komunale dhe ndërkomunale.

Neni 38

Rregullorja hyn në fuqi 15 ditë pas regjistrimit në zyrën e protokollit të Ministrisë së Administrimit të Pushtetit Lokal si dhe publikimit në ueb faqen zyrtare të Komunës dhe në Gazetën Zyrtare të Republikës së Kosovës, përkatësisht konform nenit 81 të Ligjit për vetëqeverisje lokale nr.03/L-040, dhe nenit 9 paragrafi 8 të Rregullores (QRK) nr.10/2019 për shqyrtimin administrativ të akteve të komunave.

Nr.01-352/11-0084560/19

**Podujevë,
30 tetor 2019**



**Kryesuesi i Kuvendit
Fatmir Gashi**